

Gak Ngaenzdih Ndeu

一角钱硬币

□ Cinz Lisinh / 翠丽新

Minzsiuj gojgaeq lai, miz angq hix miz lag, langh mwngz ndaej-hoengq, gou caeuq mwngz gangjlwnh.

Youq ngoenz hwnjban banhaet he, gou caeuq bingzseiz doxdoengz, dangz yijvwnz sat le couh youq henz gyangjdaiz cingileix gij cozyez godangz gyoengq hagseng ngamq gyau hwnjdaeuq haenx. Sawqmwh, miz geij daeglwg ngamq bae oknyouh ma gipgip muengzmuengz buet gvaqdaeuq lwnh gou nyi, gyoengqde youq ndaw congh diengzhaex yawjraen naed ngaenzdih gak cienz ndeu. Gyoengqde cingq gangj dwk, youh miz daeglwg ndeu gipgip muengzmuengz buet gvaqdaeuq gangj gij saeh de ngamq yawjraen haenx: “Cinz lauxsae……Cinz lauxsae……Lij Suh dawz naed ngaenzdih gip hwnjdaeuq lo.”

Vah de ngamq gangj sat, Lij Suh gaenq fwngz gaem naed ngaenzdih haenx ndwn youq henz ndang gou lo. De hai ok faj fwngz iqet de, dawz naed ngaenzdih ndenq coh dangnaj gou. Gou couh hawj de dawz naed ngaenzdih cuengq youq gwnz gyangjdaiz. Cingq youq seizneix, gyoengq hagseng humx youq henz ndang gou caezsing swenj hwnjdaeuq: “Naed ngaenzdih neix doek youq ndaw congh diengzhaex gvaq, haungaungau, gaej au fwnz gaem dawz.”

Lij Suh dingq le gipmuengz geij naeuz: “Mbouj haeu, mbouj haeu, Cinz lauxsae, caen mbouj haeu. Gou gaenq yungh raemx suiylungzdaeuz swiq geij baez gvaq lo, swiq seuq gvaq, it di hix mbouj haeu. Mbouj saeng, mwngz couh nyouq mbat he……” De doq gangj doq ndenq gvaq naed ngaenzdih gaenq swiq ndaej moqsaksak haenx daengz dangnaj gou daeuq. Yawj faj naj oiqtet de, caemhcai roxnyinh de simgip dangqmaz, gou sikhaek vih gij hingzveiz haxbaenh hawj de cuengq naed ngaenzdih youq gwnz gyangjdaiz roxnyinh naj ndat hoz nding. Gou yaek mbaetdai faenh cingz hagseng gyaezhoh gij ngaenz guekgya raeuz lo. Youq dangnaj daeg lwgnyez neix, gou roxnyinh cihgeij yaep ndeu couh bienqbaenz boux vunz iqetet ndeu, ndawsim gou cingq langh fanj rumz haenq.

Gou ciep dawz naed ngaenzdih Lij Suh ndenq gvaqdaeuq, menhmenh dawz daengz henz ndaeng nyinhcaen dwk nyouq le nyouq, riunyumnyum dwk doiq doengh boux hagseng humx gvaqdaeuq naeuz: “Gyoengq doengzhaex, naed ngaenzdih neix mbouj haeu, di he hix mbouj haeu, lij miz di heiqrang ne!”

“Lauxsae, hawj gou nyouq mbat he……” “Lauxsae, gou hix nyouq

mbat he……” Gou nyi miz hagseng siengj nyouq, couh ndenq okbae lo. Boux hagseng haenx nyouq le couh gangj: “Caen dwg mbouj haeu, di he hix mbouj haeu!” De nyouq le youh cienz hawj lingh boux nyouq, ngaenzdih sikhaek youq ndaw faj fwngz iqet gyoengq hagseng cienz bae cienz dauq, gyoengq hagseng humx youq henz ndang gou yied daeuq yied lai, mwngz nyouq gou mup, nauhyied dangqmaz. Yawj gij cingzgingj neix, gou roengzsim lo, dauqdaej mbouj miz byawz caiq yiemz naed ngaenzdih neix haeu lo.

Lij Suh riu lo, hagseng wnq hix riu lo, gou hix daj ndawsim angqvauvau dwk riu lo. Gij riu lah haeu ndawsim gizlaeg gou daeuq, hawj gou vuenheij.

“Gou youq henz maxloh, gip ndaej faen ngaenz ndeu, dawz de gyau haeu ndaw fwngz daxau gingjaz bae……” Souj go seziq gingciengz ciengq youh youq henz rwz gou yiengj hwnjdaeuq. Lij Suh couh lumj lwgnyez ndaw go neix nei, baenzneix gyaez gij ngaenz guek raeuz, couhsuenq de cij dij gak ngaenz he, couhsuenq de doek youq ndaw congh diengzhaex gvaq. Hoeng, Lij Suh hix mbouj yiemz uq, gag gip hwnjdaeuq dawz bae swiq seuq le gyau hwnjdaeuq. Danghnaeuz gou

mbouj nyienh nyouq naed ngaenzdih de ndenq gvaqdaeuq, aiq couh sienghaih daengz aen sim sienhsoh boeksad de lo.

Guh boux siujyoz lauxsae, gou rox lauxsae gangj vah guhsaeh cungj dwg son hagseng. Dang lauxsae, mbouj dan au son hawj hagseng gij vwnzva cihsiz, lij au son gyoengqde rox baenzlawz bae guh saeh guh vunz. Doiq gak ngaenzdih neix, lauheiq bouxhung bouxlaux nyinhnaeuz mbouj miz maz, miz boux couhsuenq gak cienz neix doek youq dangnaj, de hix mbouj gungj hwet bae gip hwnjdaeuq. Lwgnyez sim’angq dwk gip hwnjdaeuq, mbouj dwg gip ndaej cienz sim’angq, dwg ndaej guh le gienh saeh ndei he roxnyinh simhai. Geiq ndaej yawj saw raen daengz coenz vah baenzneix: Boux hagseng mbouj miz cihsiz dwg cungj “huq yaez”, hoeng swhsiengj binjdawz mbouj caezciengz dwg “huq yiemj”. Gou nyinhnaeuz dang lauxsae, itdingh cungj maqmuengh gyoengq hagseng son gvaq haenx cungj dwg “huq ndei”, au son’gyauq hagseng seiz, cungj au bae louzsim gij swhsiengj hagseng, mbouj hawj swhsiengj gyoengqde seizbienh deng sienghaih, saeqsim hoh ndei gij sim moix boux hagseng, caemrwg caj va hai.

Mbouj Lumz Bonjsim

不忘本心

□ Lij Lanzyen / 李兰艳

Gou doeg daengz aen gojsaeh ndeu, ndawde gangj Goengmax bae haw, daengngoengz hwnq lai, de hozhawq raixcaix. Youq gwnz loh miz gomakfiengz ndeu, gyoengqvunz cungj bae mbaet makfiengz gwn, hoeng cij miz Goengmax gig lauxsaed, naengh youq laj yietnaiq. Vunz cungj riu de huk vihmaz mbouj gwn, Goengmax gangj: “Go makfiengz neix mbouj miz cawj, sim gou gag miz cawj.” Gawq vah neix caen hawj vunz ngeix lai, dwg ha, Goengmax yienznaeuz hozhawq raixcaix lij mbouj deng gij makfiengz yoekyinx, ndawsim de lij naemj guh boux vunz mbouj damsim, mbouj luenh dam doxgaiq bouxwnq. Cungj cingsaenz neix caen hawj vunz boiqfug. Bingzciengz lumj Goengmax boux vunz yienghneix gangj saenq-

yungh gangj liengzsim caen mbouj genjdanh, raeuz wngdang yiengq de hagsib.

Youq aen sevei Cungguek raeuz, bouxboux cungj gangj vwnzmingz gangj saenqyungh dwg gienh saeh hawj vunz sim’angq ndeu. Cibbet Daih Dangj daez ok 24 cih seveicujyi hwzsinh gyacizgvanh, ndawde couh gangj lauxsaed gangj saenqyungh. Youq sevei youq swngghoz youq gunghcoz, cungj liz mbouj hai souj saenqyungh. Danghnaeuz mwngz youq swngghoz mbouj gangj saenqyungh, simdam, raen bouxwnq miz maz doxgaiq ndei couh siengj bae au, raen miz leih’ik couh gaijbienq bonjsim, mwngz couh deng vunz naeuz mwngz simyak, couh mbouj miz baengzyoux. Danghnaeuz mwngz youq gunghcoz

mbouj gangj yenzcwz mbouj gangj bonjsim, mwngz couh yungzheih guh loek saeh, engqgya yungzheih dam caiz dam leih, bae guh gij saeh famhfap haenx, doengzseiz mwngz couh gag ienq mbouj dauq lo. Miz haujlai vunz riu Goengmax huk, hoeng Goengmax dwg boux vunz cei qvavai ndeu, aenvih de iemzgek yauhgiuz cihgeij, mbouj deng bouxwnq yoekyau, dang cihgeij hozhawq dai cungj mbouj bae guh gij saeh gek liengzsim haenx. Aen makfiengz mbouj beij cihgeij liengzsim mingzdaeuz dijcienz, wngdang baenzlawz guh daihgaya cungj rox, hoeng youq leih’ik baihnaj miz geijlai vunz nyaenx ndaej?

Miz boux dang guen ndeu, de gig roengzrengz gunghcoz, vihliux hawj swhgeij swngguen, de guh saeh gig siujsim, coengzlaiz mbouj luenh dam ngaenz guekgya, lingjdaui gyoengqvunz cungj dwg yienh ndaej gig miz dungx miz bonjsim, hix rox bonjfaenh wngdang guh yienghndei, geijcib bi gvaqdaeuq, de yiemzgek yauhgiuz swhgeij, mbouj deng vunz yoekyau, ndawsim miz soq. Hoeng, miz baez ndeu, baihgwnz dawz gij cienz fuzbinz fat roengzdaeuz. Miz vunz siengj caegcaeg daj gij cienz cawjeiq, siengj heuh de luenh baecinj hanghmoeg

dauq au gij cienz fuzbinz neix, de mbouj doengzeiq. Seizhaenx yah de cingq baenzbingh naek, yw gij bingh neix au cibgeij fanh maenz, de cingq simfanz mbouj miz ngaenz yw bingh, couh siengj daengz gij cienz fuzbinz neix. De siengj bae siengj dauq, nyinhnaeuz ciuh vunz neix mbouj guh maz saeh yak, mbouj guh maz doiq mbouj hwnj guekgya, danghnaeuz guh mbat he mbouj hawj vunz rox, hix doiq swhgeij mbouj miz yingyangj. De couh gietdingh caeuq vunz caegcaeg au gij cienz fuzbinz, gvaqlaeng miz vunz gawjbauq gienh saeh neix, de deng dawz bae gyaeng, ienqhoij dangqmaz. Vihmaz mbouj nyaenx ndaej yoekyinx mbouj ciuq bonjsim bae guh saeh ne? Geijcib bi neix cungj guh ndaej daengz mbouj simdam, mbouj guh saeh loek, vihmaz seizneix couh guh loek ne? Ienq mbouj dauq lo.

Daj gienh saeh neix bae gangj, Goengmax dwg mbouj dwg boux vunz gvaq ne? Dwg raixcaix, yienznaeuz dwg gienh saeh iq, hoeng raeuz guh vunz guh saeh itdingh au gangj bonjsim, gaej deng leih’ik yinx loek, gaej deng bouxwnq yoekyau, guh boux vunz gangj saenqyungh gangj liengzsim dwg cei ndaej hawj vunz boiqfug.